

清诗别裁集

下



〔清〕沈德潜等
编

清诗别裁集

〔清〕沈德潜等 编

下



清诗别裁集卷十七

孙致弥

字恺似，江南嘉定人。康熙戊辰进士，官侍读学士。有秋左堂诗。○松坪未第时尝为副使，采诗朝鲜等国，极韵事也。馆选后，与赵文饶同罹岸狱，几濒于危矣，卒以非辜得雪。后圣祖巡幸时，以献赋复官翰林，至学士。诗筋力于唐人，无绮靡习，当时推为作家。戊辰诸公并推重之。

江行杂诗

一舸淹晨夕，平沙熾落暝。江潮晴涌月，山火夜烧雲。黑想蛟涎出，腥愁虎气闻。明朝牵百丈，回首白鸥群。炼句近岑补阙，宋人便一直写去。

鹭鸶村下路，停策吊沉沦。大义存晞髮，高风缅补唇。明时甘浪迹，乱世得全身。搔首严陵濑，南阳有故人。晞髮，补唇一联，过谢翱墓，方干宅也。五六分承，结到严陵钓台，乃见宗主。

城迴浮雲外，舟移乱石间。波光能夺月，滩势欲驱山。过险心犹悸，思乡鬓欲斑。君看松顶鹤，雲暝亦知还。

福州道中

指点三山近，轻雲护翠微。晓烟榕叶暗，春雨蔗田肥。野女修棕笠，溪人浣氎衣。啼鹃苦竹里，争道不如归。

秋感

辽海关门百二雄，长城万里忆先公。储胥自有风雲护，部曲空成带砺功。一战龙旗劳汗马，廿年贝锦怨藏弓。不堪蔓草祈连冢，况复铜驼恨未穷。自注：先中丞赞辽十载，尝摹龙文大纛，鼎革四王及黄镇南辈皆出麾下。○郭令公部曲皆封公侯，李义山咏浑瑊诗，有「咸阳原上英雄骨，半向君家养马来」，诗中亦同此感也。

咏史次王玠右先生韵

南都歌舞动雲霄，回首燕台王气遥。燕颌何年驰铁马，羊头此日总金貂。霓旌小苑明秋月，锦缆长江泛暮潮。龙虎亲军三十万，登坛空想霍嫖姚。此见四镇不能周防，而金貂皆归铜臭，虽长江天堑不能守也。下章兼选优伶言之。

六朝遗恨水潺潺，金殿繁华闭翠烟。但听临春歌玉树，不闻清庙奏朱弦。铜驼泣露飞鸣镝，铁锁沉江渡战船。虎踞山前明月在，秋风怨绝李龟年。

同峻思大年访华天御先生

蒲帆片片带斜晖，路转蒹葭兴不违。白露为霜枫欲脱，澄江如练雁初飞。沧桑廿载衣冠在，猿鹤三军事业非。回首悲笳惊日暮，新亭风景一沾衣。

感旧示魏禹平

寒灯无焰醉膏腾，独对遗编感慨增。复壁人曾藏北海，墓门剑许挂延陵。全家大节存忠孝，三世深交历废兴。郭隗台荒荆棘里，茫茫枵触恨难胜。自注：魏忠节公被逮，子敬先生从行。先中丞独匿之邸舍。及忠节卒，先公尽斥衣物，佐其归装，延陵许剑，乃与子敬札中语也。○忠节公父子忠孝，中丞公子身仗义，三世交情合并写来，遂觉生气满纸。

至江宁再叠前韵

蔽日浮雲已暂开，先秋偏觉气悲哉。燕归知入谁家巷，凤去愁看旧日台。胥靡敢期通帝

梦，檻车羞比霸齐才。炎歊苦忆凉颺好，凭仗悲笳及早催。此学士脱罪后，重至金陵作也。胥靡之梦虚期，檻车之徵无望，词近退藏，而用世之怀勃然言下矣。后之遇合，已兆于此。

同介修孟游集元夫园居即事抒怀

朱弦寥落赏音微，尊酒论心静掩扉。遮莫文章供齿颊，底须愁病减腰围。驮隄七日堪千里，大鸟三年始一飞。醉拂吴钩谈转剧，主人忘送客忘归。

张尚瑗

字弘遽，江南吴江人。康熙戊辰进士，官翰林院庶吉士。改江西兴国县知县。○损持太史诗，风神未足，沉著有餘，犹书家之颜平原、柳诚悬也。生平宗法昌黎，故尤工古体，诗稿止镌游闽、粤作，今全稿散失矣，深为惋惜。○去官后，笑疏诸经甚富，已镌者有三传折诸。

上滩

顺流船似箭，逆流船似绊。衢睦地势殊，牵挽程难算。江底清无泥，齿齿白石粲。船石相磨治，牢确冰初泮。深者四五尺，浅或未及半。牵船蹋冰行，挽衣不掩肝。胶浅恣难施，肩舁杂呼唤。已前而复却，欲迎或还扞。一滩抵数里，一里或数滩。滩滩行相续，侵晓到日旰。惶恐黯默名，熟闻心已惮。岂识灏纹江，惊湍尔许悍。长歌行路难，击楫发三叹。起二语谣谚，已领一篇之意。后形容上滩险艰，不遗餘力，令读者目骇心悸。滩亦音叹，收十五翰中。

九鲤湖

艰哉观澜亭，所历皆悬度。过此鸟道绝，从游慄相顾。途危景益佳，兴发情无怖。身非邳侯骨，暂作壁间步。强半蛇螭曳，有时猱攫攫。磴断体欲缢，根蟠足稍驻。琤琤丝竹涧，烂漫琪玕树。擘水石双门，挂岭玉三柱。却望珠帘垂，银潢屑烟雾。直下去无几，遽回劳予溯。湍驶何潺潺，褰裳不可渡。长啸向白雲，茫茫苍靄互。径路断绝，缘壁而行，蛇螭同曳，猱攫并腾，服其真写得。曩游黄山莲花沟、百步雲梯，曾亲历此境。

谒韩文公祠

总角诵公文，不啻编三绝。半世味公道，无能剑一映。维公不朽姿，薄雲贯虹蜺。谤伤与夸眩，两者均蠛蠓。氛氲一瓣香，万古应同爇。举举何末生，敢云景行切。潮阳谪宦区，偶然鸿爪雪。借此涤炎陬，海滨斗杓揭。湖流漾清派，峰势环飞岳。江山衍明德，临眺心神澈。白雲飘檐楹，恍忆灵旗掣。公之行道，只在伦常日用，不特谤伤者可嗤，即夸眩者亦见之未真也。读原道篇自得。次章并其弟子表之，明其熔冶人才，有功后学。

史公识尊圣，世家表弟子。后虽未敢例，义在可窃比。济济伊洛徒，游扬复罗李。韩门数

入室，若籍湜服喜。唐宋两朝史，附传共编记。匹夫百世师，坡言得之矣。配禹尚非夸，传轲又何訾。荒荒海水南，明珠孕天水。过化遂成材，庙食芳蘋芷。虬枝侍郎木，桧楷同蕤蕤。

观音岩

巨灵施昆刀，劈破青玉笋。千里插江面，削平如概准。群冈互起伏，离立车连轸。独此珉瑶屏，截肪无粟疹。顶矗日黯黯，趾沉波泯泯。一线裂石罅，虚中驾阑楯。香华鬘陀像，洞栖谷牝。凄风飒然来，猱攫度必震。安得立三分，言从伯昏瞢。王渔洋赋此题，中云「骑危踞虚空，险绝缘钩梯」。此云「一线裂石罅，虚中驾阑楯」，可以互证，想见左右石壁，危阑驾壑，此岩未易登也。

弹子矶

竞秀英州山，临江多俯瞰。观音与弹矶，巉绝奇尤占。划然千仞壁，削出长天锺。鸿蒙开辟时，鬼斧安施鑿。虬柯缕络之，蒙茸纷碧紺。乳窦小于拳，累然不容觚。相传广明贼，弹落金丸陷。雄非天山矢，险异蜀门剑。但见滩流驶，湍急不可缆。怀古夫如何，寒风江湛湛。渔洋南来志云：「弹子矶悬崖千仞，如洞如厂，斧凿鏤鑿，拟于鬼神。」诗中亦可互证。广明贼，未详。

仙霞关

七闽路与中原通，怪事咄咄惊天公。冈连岭复雲树匿，飞鸟不度猿猱穷。微茫一线走绝壁，谁凿溟涬开鸿蒙。二十八盘尤斗绝，路难直似摩苍穹。王公守国天设险，嵎函纒轅自古崇。兹岂小巫怯百二，偏隅冷落箐篁中。正恐五丁力不到，无诸倔强凭馘馘。尔来文物盛唐宋，舟车衢信当要冲。蛇形蟠曲磴磴道，史浩于此开榛丛。宋明王孙两遗种，哀哀望帝啼鹃红。日者井蛙跳涔水，高拥黄屋弯朱弓。阴平夜縋渠帅缚，昆仑电扫巢穴空。虽云负固不可恃，车箱箭筈名益隆。热行五步一回首，仆夫告瘁心神忡。残旗折戟渺何许？故垒瓦砾馀蒿蓬。淙淙飞泉下幽壑，辘冲百道鸣丰隆。回溪互证前路失，恍惚七圣迷崆峒。南风不竞自天道，嗟哉竖子时无雄！欲呼真宰铲叠嶂，永俾灌莽无伏戎。左鼓右旗列几案，挖舟舁轿从西东。怀古登危重兴叹，溟茫襟袖侵霏雾。仙霞关为闽、越扼要界，高二十里，为级三百六十，曲二十二，宋史浩所开辟也。康熙中，逆藩耿精忠谋越此关，制府李之芳以兵遏之，卒以就擒。中一段正指其事，纵横排界，一气蜿蜒，得昌黎之气骨。

查

昇

字仲韦，浙江海宁人。康熙戊辰进士，官至少詹事。著有淡远堂集。○官詹书法得董文敏之神，入直南书房时圣祖屡称赏之。

访吴采山不值

秋水乘孤艇，沿缘乱苇间。时看黄叶落，境共白鸥闲。林影溪边屋，钟声雪外山。故人今不见，月出棹歌还。

过浦口和清字

公路浦口浦水清，甘罗城外征人行。大河直下千万里，哀雁差池三两声。南国浮云天际满，异乡秋草梦中生。侧身四望浑无尽，新月江关一片明。风格亦从杜出。

陈丈朴庵招赏牡丹同人即席分赋得明字

金谷何如蜀锦城，放翁旧谱阅天彭。置身富贵何须早，到眼云霞觉倍明。丁字帘前围蝶翅，午时画里验猫睛。风流共忆清平调，合座春光醉玉罍。牡丹用富贵字，最易近俗，此翻用之，转觉其雅，死活之别也。○埤雅载人得画牡丹与猫一幅，莫辨精粗，识者谓花枝哆而色燥，此正午时花也。猫眼黑睛如线，此正午时猫也，猫旦暮目睛圆，日午渐狭长，正午则一线矣。用来恰好。上一句以绣球作陪衬也。

八里庄

断井冰胶汲水痕，炊烟三两不成村。客嫌南语呼难应，门对西风火不温。白月荒途深夜柝，黄沙野菜杂蔬盆。耳边俄觉秋涛卷，卧听駉駉斲草根。

陈大章

字雨山，湖广黄冈人。康熙戊辰进士。著有玉照亭诗钞。○楚风旧沾濡，谭馀习，后又变为凌厉，芒角多而性情隐矣。作者矜平躁释，一归恬和，可以觐其所养。

九江夜泊

解帆及夕阳，系舟傍枯柳。天低九派流，浪抱孤城走。奇峰插斗南，雄势压江右。雲中五老人，见我时招手。静夜冷鱼龙，古戍沉刁斗。欹枕不成眠，且饮浔阳酒。舟中望见五老，转云五老招人，如此用笔，便觉灵活。

瓮山拜耶律文正公墓

林转河阴长，遥峰粲可数。迤邐得瓮山，嵌嵌若覆釜。劫火土一抔，英灵耿万古。元祖昔龙兴，戎马日旁午。微公济世心，斯人尽豺虎。荒祠香火微，断碣聚鼯鼠。漠漠望秋雲，含情空激楚。

耶律楚材，辽之裔也。辅元祖有济世功，予游西山，曾拜其墓。

王文成纪功碑

碑略云：正德己卯，宸濠叛，称兵向阙，破南康、九江，攻安庆。臣以列郡兵复南昌，宸濠擒，餘党悉定。天子闻变赫怒，亲统六师临讨，遂俘以归。末云：式昭皇灵，嘉靖我邦国，时庚辰正月也。明年，嘉靖入继大统，果符其讖。先是公将献俘阙下，江彬等檄令纵之鄱湖，俟上亲战而后奏凯。公不得已，间道入杭，以濠授张永，遁入九华山。随补奏，序彬、永等功上之。然公卒无赏。嘉靖初，下其议，乃起为南京兵部尚书，封新建伯。武皇巡游不知疲，朝御豹房暮京西。群狐跳梁嗥且舞，摇摇九鼎一髮危。宸濠衅踵真镠起，盘结肘腋成穷奇。堂堂孙许_{孙中丞燧、许按察達}。仗节死，东南倾刻翻潢池。虔州中丞屹柱石，忠义愤发非人为。同时幕府盛才杰，_{太守伍、邢诸公}。戮力共竖天王旗。黄石矶前一再战，扫除凶焰无孑遗。事不浹旬功再造，只手半壁扶坤维。当时庙谋亦痴绝，露布已上重誓师。天子自将佩将印，六军雷动江淮湄。谤书何止盈一篋，当关虎豹皆狐狸。深谋豁达格神鬼，苦心退托随髡緇。开先寺前七佛碣，旁有大字镌崔嵬。雅颂严正揭日月，蝌蚪错落拏蛟螭。改元兆讖实天启，酬庸锡爵开祲期。平原之书次山笔，千载以后非公谁？昔从流传看拓本，顷来石壁瞻丰碑。公之英烈传万古，求之翰墨盖已卑。区区群儿肆口舌，剑

首一快终何施。呜呼！奇人奇功不世出，使我摩挲再拜兴嗟咨。真籍，安化王也。先宸濠反，杨一清、仇钺讨平之。○王守仁禽宸濠只三十六日，时安边伯许泰、太监张忠等皆受宸濠贿，恐守仁见上声其罪，转言守仁先与宸濠连，后乃变计。武宗知其忠，不信，复言其必反，多方沮抑之。守仁先以宸濠付张永，既乃入九华山僧寺待罪，得免。诗中直陈始末，作传读可也。

登小孤山

蜀江万里浮鸿蒙，洞庭势挟彭蠡雄。小孤突起插天半，百川砥柱为之东。磴道虚无动寒色，渔舟一叶傍绝壁。蛟鼉正昼吼风霾，泱泱孤雲天地白。参差楼观丽朝霞，绣鞶珠箔颜如花。阴岩咫尺蓄雷雨，怪树千岁盘龙蛇。吴楚雄关此第一，折戟沉沙莽萧瑟。凭阑决眦倚半酣，尽卷乾坤入诗笔。隔江清霭有彭郎，银河带水遥相望。舟师招手闻绝叫，急趁南风过马当。小姑娘彭郎，东坡偶然戏笔，后人辄以此相谑，殊可笑也。此出以端重之笔，能脱窠臼。

送胡卜子南归

春光叫彻栗留音，赠别何堪折柳吟。空说高台收骏骨，只应敝帚享千金。五更风雨穷交泪，驿路莺花故国心。白雉冈头荒圃在，未妨述作老雲林。

次韵姜西溟秋日杂感

珥笔频年在石渠，一囊官粟百无馀。自注：君久与史局，食俸而未得官。伯鸾本不因人热，中散从知与世疏。尺蠖屈伸存我法，蜗牛负戴亦吾庐。短檠取次新凉入，珍重穷愁且著书。

戊子生日书怀

少日凌兢履畏途，抽身雲水补桑榆。负薪未便惭翁子，学句犹能做丈夫。勋业尽抛青琐客，形容尚类列仙癯。萧条四壁空无有，新挂庐山瀑布图。自注：时有游庐山之意。观化久师齐物叟，忘机甘作灌园人。熊鱼自古难兼味，木雁中间可置身。野艇笼烟催放鹤，断槎欹石坐垂纶。一编最爱襄阳传，聊为清时备隐沦。

陆寅

字冠周，浙江钱唐人。康熙戊辰进士。○冠周，高士丽京之子。丽京出亡不归，冠周访父，几遍字内，终不得，幽忧毕生。少岁即有豫章拔地之势，遭困厄，诗品愈高，刊文集时，名未成也。戊辰后，诗无刊本，故未得见。

歧路行

出门竟何之？东西南北皆路歧。仆夫执轡马踟躕，骊歌一声声最悲。道傍桃李似惜别，飞

花故扑金屈厄。人生目前贵适意，不如还逐屠沽儿。兄袁盎，弟灌夫，相逢自负高阳徒，樽蒲百万能呼卢。朝金张，暮许史，拔剑欲为知己死，眼前谁是严仲子？

宣德箭歌

丁巳夏，余客长安。市有鬻爬背麻姑爪者，视其杆，有「宣德八年餘干县所贡竹箭」字，后无所用，散落民间，改为爬背之具。余乃作歌。

长安城东鬻废箭，故老欷嘘万人看。金镞敲残鼓铸锋，鸦翎落尽丹黄变。弃掷风尘未尝试，老杆分明宣德字。珍惜曾教武库藏，标题尚识良工制。高皇昔日戎衣著，剑埽妖氛定雄略。已见蒲稍入大宛，更闻薊酱开邛笮。茫茫九服初通贡，竹箭东南待弦控。包茅常例豫章来，司空檄取官胥送。貽谋孙子但垂衣，夜夜黄星护紫微。三殿日高香不散，上林花暖燕群飞。夕烽并罢平安火，服御深宫无一可。青磁烧出碧鸡成，熏炉制就黄金裹。内家擎献龙颜动，流落人间至今重。金马铜驼倏已非，石弩楛矢成何用？只今新制逾工巧，故物休言旧时好。猛将难调神臂弓，仙人且代麻姑爪。君不见银泉山下草萧萧，狐兔秋原正寂寥。仰天大笑羽毛落，一箭穿雲看射雕。明自宣德后，武备渐弛，至正统而有土木之变矣。从废箭中发露此意，点入宣窑、宣炉，不同闲笔。

秋日忆家大人粤游

又见秋风动，芦花江渚飞。忍看时序变，犹与老亲违。远信无他语，深情只望归。应怜挥手日，儿女共牵衣。真挚近杜。

自笑

自笑桑弧志，天涯只布衣。到家翻是客，逆旅岂如归。白日从愁尽，青山入梦非。缄书与僮仆，为扫钓鱼矶。五六写尽作客人心事，「青山入梦非」，即「梦里还家不当归」意，此觉更简。

钱塘怀古

祠庙吴山草木凋，芦中穷士旧吹箫。眼看吴市东门甲，怒卷钱塘八月潮。乌喙竟能亡敌国，鱼肠应悔刺王僚。锦帆一片风流尽，白马红旗浪里招。东门，史记正义谓阖门，即解门，后改衙门。子胥云：「悬我目于东门之上，以观越寇之入也。」梅刺王僚，见位传僚之子孙，越未必灭吴也，前此无人道及。

秋日杂感

翘首天涯那可凭，丹枫一望泪初凝。邻羞枳里逢严遂，曾否夷门辱信陵。揽镜未应头似

雪，埋忧不办酒如绳。棹歌且逐中流去，荡桨操舟我亦能。
颌联见不逢知己意。

沈名荪

字硐房，浙江钱塘人。康熙庚午举人，选攸县知县，未赴。著有梵夹集。○渔洋香祖笔记中载门人沈

硐房诗话三则，本字硐房，笔记中应误书。

题画册

篷开猎猎风脚，舵曳潏潏浪痕。杜宇飞边蜀道，哀猿啼处荆门。远红夕照千里，浓绿垂杨几村。已到落帆亭下，客心还怕黄昏。
六言律诗，偶备一格。

去京师

望望南天雲树迷，沧浪仍卧钓鱼矶。谁言京洛缁尘满，我独还家是素衣。
予咏白燕末二语云：「京洛何妨共栖宿，素衣未必化为缁。」有同心也。第硐房写怀，予则托兴。

丙戌榜前梦罗昭谏见过

鹤袍乌帻一先生，刺写江东给事名。八百年来成把臂，可能同访旧雲英。
自注：昭谏有赠旧妓

雲英诗：「我未成名君未嫁，可怜俱是不如人。」